



ज्वजलपा वाःपौ

JWOJALAPA WEEKLY

दँ ७ ल्या: १६ (पूर्णङक ११८) ने. सं. ११३७ कछलागा त्रयोदसि आइतवा: २०७३ मंसिर १२ गते आइतवा: (Nov- 27, 2016)

मू ८।- पृष्ठ ६

अन्ततः नयाँ शक्तिपाखें २६ बुँदाया माग समर्थन संविधान संशोधनया सवालया ध्रुविकरण

ज्वजलपा वा:पौ /

नेपाःया आदिवासी जनजाति, मधेसी, थारु नापं उत्पीडित समुदायया पहिचानया आधारय् राज्यया पुनर्संरचना यायेमाःगु, भाषिक नापं हरेक ख्यलय् समानता दयेमाःगु माग याना आन्दोलन याना वयाच्वंगु संघीय गठबन्धनया २६ बुँदाया मागयात नयाँ शक्ति नेपाल समर्थन याःगु दु ।

पुलांम्ह प्रधानमन्त्री डा. बाबुराम भट्टराईया नेतृत्वय् दुगु नयाँ शक्ति नेपालपाखें नेपाःया उत्पीडित समुदायया माग कथं न्हापांगु संविधानसभाया राज्य पुनर्संरचना समिति नापं अबले गठन याःगु राज्य पुनर्संरचना आयोगया प्रतिवेदनया आधारय् हे राज्य पुनर्संरचना यायेमाः धकाः २६ बुँदाया मागयात समर्थन याःगु खः । वार्ताया माध्यमं समस्या समाधान याना न्ह्याः वनेमाः धकाः नं धाःगु दु ।

छुं दिं न्ह्यः जक च्वंगु केन्द्रीय समितिय बैठकं उगु कथंया निर्णय याःगु खः धकाः उगु पार्टीया नेतातय्सं जानकारी वियादीगु दु । अथे हे वइगु २०७४ सालया माघ ७ गते दुने स्थानीय, प्रदेश व संघया चुनाव यायेमाःगु बाध्यकारी अवस्था दुगुलिं



उकियात ध्यान तया नं वार्ताया माध्यमं समस्या समाधान यायेमाः धकाः नयाँ शक्ति नेपाल धाःगु दु ।

थ्व हे दथुइ संविधान संशोधनया सवालयात कया राजनीतिक दलत तिव्र रुपं ध्रुविकरण जुया वंगु दु । सत्तापक्ष माओवादी केन्द्र व कांग्रेस संविधान संशोधनया प्रस्ताव संसदय् दर्ता याना न्ह्याः वनेगु लाइन ज्वना वनाच्वंगु दुसा प्रमुख प्रतिपक्ष दल एमाले धाःसा संविधान संशोधनसिवें संविधान

कार्यान्वयन प्रमुख विषय खः धकाः न्ह्याः वनाच्वंगु दु । अप्रत्यक्ष रुपं संविधान संशोधनया विपक्षय् दनाच्वंगु दु एमाले । उगु हे कथं आन्दोलन याना वयाच्वंगु संघीय गठबन्धन थःपनिगु माग कथं हे संविधान संशोधन यायेमाः धकाः माग याना वयाच्वंगु अवस्था दु । उकिं संविधान संशोधनया सवालयात कया स्वंगू कथंया धार थौकन्ह्य विकास जुयाच्वंगु दु । लिपांगु इलय् वया राप्रपा व राप्रपा नेपाल एकता जुया

राप्रपा निर्माण जुइ धुंकूगु अवस्थाय् सत्तापक्ष माओवादी केन्द्र कांग्रेस एमाले मदुसां नं संविधान संशोधन यायेफइ धकाः तायेका संविधान संशोधनया ज्यायात प्राथमिकता बिया वनाच्वंगु दु । तर आन्दोलनरत संघीय गठबन्धनलिसे धाःसा खास हे खँ मिले जुयाच्वंगु अवस्था धाःसा मदुनि । यदि सत्तापक्ष माओवादी, कांग्रेस, राप्रपा नापं आन्दोलनरत संघीय गठबन्धन जाना मेमेगु चिचीधंगु दलया नं समर्थन

कायेफत धाःसा एमाले विपक्षय् च्वन धाःसां नं दुई तिहाई बहुमतं संविधान संशोधन यायेफइगु अवस्था दु । तर उकिया नितिं एमाले बाहेकया दलत धाःसा छप्पं जुया छगू हे मत जुइ फयाच्वंगु मदु ।

उखे एमाले धाःसा मेपिं फुक्कं छप्पं जूसां थःपिं याकःचा च्वना जूसां संविधान संशोधनया विपक्षय् दनेगु अले उकिं याना कन्ह्य पहिचान विरोधीतपाखें थःपनिगु पार्टीयात समर्थन याइगु अवस्थाय् दक्ले तःधंगु दलया रुपय् स्थापित जुइत ताःलाई धकाः थुइका च्वंगु दु ।

पहिचानया माग याना वयाच्वपिं मधेसीत राजनीतिक रुपं सचेत जूगुलिं इमिगु मत मवःसां नं आदिवासी जनजातित पहिचानया मुद्दाया सवाल मधेसीतयगु तुलनाय् राजनीतिक रुपं सचेत मज्जुगुलिं आदिवासी जनजातितपाखें नं थःपिन्त हे समर्थन जुइगु अले खस आर्य समुदायपाखें थःपिन्त हे समर्थन याइगु अवस्थाय् कन्ह्य वना दक्ले तःधंगु दलया रुपय् स्थापित जुइ धकाः एमालेया नेतातय्सं तायेका थःपनिगु अडानयात आः तक नं कायम हे यानाच्वंगु दु ।

भितुना ! भितुना !! भितुना !!!

ज्यापु महागुथि किपू नगरसमितिया दुजः नापं नेवाः भाय् नापं सांस्कृतिक ख्यलय् अभियन्ताया रुपय् क्रियाशिल जुयाच्वंम्ह किपू तःननि त्वाःया भरत महर्जन नेपालभाषा एमए तगिमय् ने.सं.११३६ दँय् दक्ले अप्वः ल्याः हया मोतिलानी सिरपाः त्यकादीत ताःलाःगु दु वय्कःया पलाः सुथां लाना अफ न्ह्याःवने फयेमा धकाः भितुना देछयाच्वना ।

ज्यापु महागुथि किपू नगरसमिति
किपू





ज्वजलपा वा:पौ

सल्लाहकार
श्रीकृष्ण महर्जन
प्रकाशक:
नजरराम महर्जन
सम्पादक
श्रीकृष्ण तण्डुकार
ले-आउट:
ज्वजलपा डेस्कटप
संवाददाता

भरत महर्जन, निरजमान सिंह
थाक्

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : jwojalapaweekly@gmail.com

सम्पादकिय

प्राधिकरण व लोडसेडिड

शौकन्हय् स्वनिगल्य लोडसेडिड मुक्त जुयाच्वंगु दु । छुं महिना न्हय: तक मनूतयसं कल्पना तकं याये मफुगु ज्या जुयाच्वंगु दु । न्हापा प्रचण्ड हे प्रधानमन्त्री जुयादीगु इलय् दक्ले अप्व: लोडसेडिड जूगु ख: । उकिं छगू कथं प्रचण्डया बदनाम तकं जूगु ख: । थौं न्हापाया तुलनाय् अप्व: मतया माग दु अय्त्नं प्रचण्ड हे प्रधानमन्त्री जुयादीगु अवस्थाय् स्वनिग: लोडसेडिडपाखें मुक्त जुयाच्वंगु दु । थ्व छगू कथं अजूचाइपुगु ज्या जुयाच्वंगु दु ।

लोडसेडिड मुक्त जुल धका: नागरिकतयसं छगू कथं आनन्दया सास: ल्हानाच्वंगु हे अवस्थाय् नेपाल विद्युत प्राधिकरणया अस्थायी कर्मचारीत आन्दोलनय् क्वहां वया लोडसेडिड मुक्त यायेगु संभव जुइमखु धका: तकं ख्याच्व: बिइगु यानाह:गु दु । जनता नाप प्रत्येक्ष रुपं सरोकार दुगु लोडसेडिडया हे छगू कथं पक्षय् आन्दोलनरत कर्मचारीत दंगु थें महसूस यानाह:गु दु ।

थ्व घटनायात स्वल धा:सा गनं लोडसेडिड जुइगु कि मजुइगु धइगु अले न्हापा प्रचण्ड प्रधानमन्त्री जुयादीगु इलय् यक्व लोडसेडिड यायेगु ज्या कर्मचारीतयसं हे या:गु जकं मखुला धका: मनूतयसं न्हयस: तयाह:गु दु । लोडसेडिड धइगु हे कर्मचारीतयगु चाहाना कथं जुइगु ख:सा थ्व तसकं दुर्भाग्यपूर्ण खँ ख: । उकिं लोडसेडिड नाप मस्वाकूसे कर्मचारीतयसं थ:पनिगु हक अधिकारया नितिं जक स: तया वन धा:सा बांलाइ मखुसा जनतां कर्मचारीतयगु आन्दोलनयात बांला:गु मिखां स्वइमखु धका: थुइकेमा: ।

गजल शौरभ शाक्यया

गजल(९

छु ल्यं दनि स्व:, धायेत आ:

छुं हे मंत स्व: कायेत आ: ।

गुलि सतित उलि हे ता:पा

त्वह: माल स्व:, बायेत आ: ।

भिग छु जुल, लुमकि व छुं

क्वाज: हे मंत स्व: नायेत आ: ।

दु:ख नापं सुख उलिहे स्वापु

छुं हे दापु मंत स्व: फायेत आ: ।

याक:लात, थ: मदु सुं सु हे

पासा ला माल स्व: जायेत आ: ।

ज्यापु जुयाया गर्व दुम्ह शुकराम दाइ



—नजरराम महर्जन

शुकराम दाइ, मर्चानिसैं ल्याय्म्ह बुरा बुरी सकसिया शुकराम दाइ । थौं वयक: भीगु न्हय:ने मदय् धुंकल । भीगु न्हय:ने जक मखु, थ्व संसारय् हे वयक: मदय् धुंकल । वयक: अन भ्फाया दी धुंकल । गन वनेवं भीपिं गबलें लिहां वये फैमखु । गन भीपिं सकलें छन्हू वने हे मानि । आ: भीगु न्हय:ने वयक:या लुमन्ति व वयक:नं क्यना दीगु लैपु जक दनि । थौं वयक:या लुमन्ति वयक:या म्थ्याय् मयजु रामदेवी महर्जन व काय भाजु प्रकाशराम महर्जन वयकलं नेपालभाषां भाय्हिला च्वयादीगु स्वस्थानी धलं बाखं पिथनेगु व ज्येष्ठ नागरिकपिन्त आजु छ: चाहिइके हया: च्वन । थौं वयक:या लुमन्ति सिबाय् भीके छुं मन्त । वयक: नं क्यना भ्फा:गु बांला:गु लैपु नाला कायगु सिबाय् भी न्हय:ने आ: छुं मन्त । जिं म्हस्यूम्ह शुकराम दाइ थथे च्वं ।

समाज सुधारक:— वयक: जि स्वया यक्वं थकाली । जिमि बाया पासा ख: । अय्सां वयक: नं जित: पासा थें ब्यवहार याना दिल । वयक:यात जिं दकलय् न्हापां छम्ह समाज सुधारकया रुपय् म्हसिल । जातिय भेदभावया कतर विरोधि ख: वयक: । थ्वहे जातिय भेदभाव मदयेकेया लागि वयकलं धुसी नाय्तय्थाय् 'कंस या ध्वंस' नांया दबू प्याखं स्यना दिल । गुकिया सहनिर्देशक जि नं ख: । प्याखं पिदने त्य:का छम्ह मनू मव:गुलिं जिं नं चिकिचा हाक:गु भूमिका म्हिते माल । वयक:या विचालय् मनू सकलें समान ख: । थ्व थजात क्वजात ला समाजया सामन्तितयसं भी भी दथुइ ल्वाका: भीत कमजोर यायेत याना:त:गु षडयन्त्र ख: । थुकी भीपिं बांमला:क क्वव्वाना च्वंगु दु । थजात क्वजात धैगु छुं हे मखु । मनू मात्र सकलें मनू जक हे ख: । थ्व थजात क्वजातया भेदभाव मदयेकेत न्हापां भीसं नं सुधारया लैपु ज्वने माल । थ्वहे विचा: ज्वना । इमि नापं जिमिसं समय नया, भव्य नया । जिमित गुलिसिनं कुं खिन । अय्सां जिमिसं पर वाह मतया । न्हापा ज्यापु स्वया थहांवंगु धयात:गु जातपिन्थाय् छुं नयेबले नयागु थलबल भीसं हे सिलावयेमा: । थ्व खँया वयक: घोर विरोधी । वयक: नं जिमित धयादी भी ज्यापुत नं सुं स्वया: कम मजू । थ्व नेपा: गा:या धर्म, संस्कृति ल्यंका: तयापिं भीपिं । इमिथाय् छैं वनेवं नयागु भू भीसैं सिलेमा:सा भीथाय् छैं नं इमित सीकेमा: । थौं भीसैं खना:च्वना भीगु समाजय् थीत्य:

शुकराम दाइया भिनिक्वगु पुण्यतिथि मंसिर ९ गते वयक:या लुमन्तिइ वयक: नाप जिगु स्वापु अले वयक:या बारे जिं सिउगु व जिगु नुगलय् लानाच्वंगु खँत थन न्हयव्वयेगु कुत: यानाच्वना ।

थीमत्य: धैगु हे मदय् धुंकल धासां ज्यू । जातिय गौरव—वयक:याके ज्यापु जुयाया गौरव दु । थ:गु जा:त तधं धैगु वयक:याके गौरव दु । गुलिसैं ज्यापु धायेके मय्या: सुवाल, डंगोल, सिंह धका: च्वया दी । वयकलं छक: प्रयाग मान सिं सुवालयात कया: धया: दिल, “प्रयाग मान सिं सुवाल नं भी ज्यापु हे ख: । ज्यापु धाय्के मछाला: सुवाल धका: धाल । अज:पिं त:धौपिं मनूतसैं ज्यापु धका: थ:गु परिचय ब्यसाका ज्यापु धाइपिं नं थुलि च्वय् थ्यं धका: सकसैंनं सी । धोकासीया बुद्धिवहादुर मास्तरं बुद्धि बहादुर ज्यापु धका: च्वयादीगुलिं वयक: तसकं लयताना दी । च्वछाया दी ।

संगीतकार:— वयक: छम्ह संगीतकार, गुरु नं ख: । न्हापा भीथाय् दबू प्याखं स्यनीबलय् प्याखनय् म्ये नं यक्व दैगु । शब्द नेवा: व मौलिक जूसां म्येया लय् व धून फिल्मया जुइगु । व म्येत न्यना: वयक: नं नुग: ख्वयेका: दी । वयकलं धयादी संगीत धइगु समुद्र ख: समुद्रय् न्ह्याक्व ल: का:सां फुइमखु । संगीत धैगु भीगु मौलिक तय्मा: । थ्व हे धारणां याना: वयकलं गुलि नं दबू प्याखं स्यनादिल उकिया मौलिक संगीत हे तयादिल । प्याखं म्ये व लय् फुक्क थ:म्हं हे तयादी । वयक: नं थ: स:गु संगीत थन यक्वसित स्यना नं दीगु दु । भी भाजु रामकृष्ण दुवाल, भाजु चन्द्र महर्जन, राजभाइ जक:मिपिन्त वयकलं संगीतया ज्ञान बिया: दीगु जित: लुमं, जिं स्यू । अफ् लेबोरेटरी स्कूलया ला वयक: संगीत गुरु हे जुल ।

शिक्षा व भाषा प्रेमी— वयकलं धया: दी । शिक्षा मनूतय् दुनेच्वंगु मिखा ख: । शिक्षा मदया हे भी ज्यापुत क्वयलाना च्वंगु ख: । न्हापा भीथाय् जल विनायक मिडिल स्कूल छगू हे जक दु । न्हयगु तगिं पास याना: यें आख: व्वनेमा: । उकिं यक्वसैं आख: व्वनेगु हे त्व:तीगु । थ्वहे खँयात वा:चायेका: वयकलं मेपिं पासापिं नाप जाना जनसेवा प्रौढ हाइस्कूल चायेका दिल । न्हूगु शिक्षा वयेवं जनसेवा मा.वि. जुया थौं भीथाय् बांलाक चलय् जुयाच्वंगु दु । वयक: नेपालभाषाया छम्ह प्रेमी व ग्वाहालीमि नं ख: । थौं जि नेपालभाषाया छम्ह उपन्यासकारया रुपय् पिलू वया । थुकी वयक:या त:धंगु देन दु । जिं न्हापा बाखं च्वया वयक:यात न्यकेगु वयक: नं जिगु बाखं न्यना: गबलें कुं खिना: मदी बरु जित: ह:पा बिया दी । जित: साहित्य सम्मेलन जुइथाय् ब्वति काय्के यंका दी । जिं यक्व सिरपा नं कया हया: । वयक:या हे प्रेरणा व ग्वाहालि कथं ने.सं १०९१ (२०२७) सालं



मदुम्ह शुकराम महर्जन

सूर्यज्योति पुस्तकालयया ग्वसालय् पांगाय् त:जिक नेपाल भाषा साहित्य सम्मेलन यायेफत । वयक:या प्रेरणां शिक्षा बिकासया लागि पुस्तकालय छगू नं मा: धका: वाचायेका: महेन्द्र पुस्तकालय व शहिद स्मृति पुस्तकालय चायेकेत कुत: या: जुया । अबले वयकलं जित: धया:दीगु जि थौं तकं भलभलं लुमनि । “कतकिया चिप जक गुलि नयेगु थ:म्हं हे न्हूगु पुस्तकालय चायेकेगु स्व:।” अनं लिपा धुसिइ दाजुकिजापनिगु ग्वाहालिं सूर्यज्योति पुस्तकालय चायेका

वयक:नाप जिगु संगत भिदै जक जूगु ख: । २०२४-२०२४ तक जक ख: । जि वीरगंज वनेधुंका: नं वयक:लिसे वरोबर नापलाना: च्वना । गबलें बिहार , गबलें लाछी न्ह्याथ्थाय् नापला:सा पांगाया राजनीति, शिक्षा व भाषाया बार खँलावल्हा जुइगु जिथें च्वम्ह ग्वाहालिमि पासा नापं मदया वयक:या तसकं म्हाइपु धाइगु । वयक:यात जिं बांलाक म्हस्यू । मेपिनिसं जित: धाइगु शुकराम दाइ नाप छ अपायसकं गथेजुया मिलय् जूगु । छिमि छक: हे कचकच मजूला ? अपायसकं जिहिम्ह मनूनाप गथेजुया मिलय् जुया ? ख: शुकराम दाइ थ:गु खँ बांलाक तयादीम्ह मनू ख: । भीसं वयक:या खँ थुइका: स्वीकार यायेमाल, मखुसा वयक: नं धयादीगु खँयात बांलाक तर्कपूर्ण खण्डन यायेफय्के माल । अथेजुल धा:सा वयक: नं थ:गु खँ लितकया: दी भीके माफी फनेत नं लिचिला दी मखु । थथे हे जुया: जिपिं निम्ह न्ह्याक्व गफया:सां गबलें तसकं हालेम्वा: छम्हेसियालिसे मेम्ह न्ह्याबलें मिलय् जुया च्वना । मंसिर ८ गते जि वीरगंज यें वया । मोटरसाइकलं वयागु । ल्हातुति त्यानुसे च्वन । छैं वया बजि नया । पलख ग्व:तुला च्वना । न्हयता त्या इलय् जिमि तिरिमय् जुं धाल, “भिग: दुवालजीयागु फोन व:गु पांगाय् शुकराम दाइ तसकं उसाय् मदु धा:गु छक: स्ववनेगु मखुला ?”

जिं उबलय् अय्ला नं भतिचा त्वने धुन । उकिं धया कन्हय् सुथय् वनेका । तर व सुथ गबलें मवल । वैनं मखुत । अन्तिम इलय् वयक: नापलाय् मखंगु जिगु नुगलय् न्ह्याबलेया लागि थाना च्वनीगु जुल । आ जिं नापलाय धयां नापलाय् खनी मखुत । थ्व खँ सदाया लागि नुगलय् थुं दिनाच्वन ।



शुकराम दाइया स्वस्थानी धलं बाखं पिदन

भुजिन्द त्वा: पाँगाया स्व. शुकराम महर्जनं नेपालभाषां भाय्हालादीगु स्वस्थानी धलं बाखं वंगु मंसिर ९ गते छगू ज्याभव:या दथुइ पिथनेगु ज्या जुल । वयक: मदुगु भिनिदं पुण्यतिथि लाका: वयक:या म्थ्याय रामदेवी महर्जन व काय प्रकाश राम महर्जनं पिथना दीगु ख: ।

उगु हे ज्याभवलय् ज्येष्ठ नागरिक सेवा केन्द्रया ज्येष्ठ नागरिक पिन्त स्वंग: बसय् तया: किपूया आजु छ: (बाघभैरवस्थान) चाहिइके यंकूगु दु । किपूया चिथुली तक बसय् तया यंका: अननिसें धिमे थाना: ज्येष्ठ नागरिक लसकुस याना यंकूगु दु ।

बाघभैरव थ्यनेधुंका: सकसिनं छ:पुजा याये याना: छगू चिकिचा धंगु ज्याभव: याना सफू पिथनेगु ज्या जूगु ख: । ज्येष्ठ नागरिक क्लबया सचिव अर्जुन महर्जनं न्थ्याकादीगु उगु ज्याभव:या सभा नायो ज्येष्ठ नागरिक सेवा केन्द्रया नायो दुर्गा कुमारी महर्जन

जुयादिल । केन्द्रया छयान्जे हरिदेवी महर्जनं लसकुस न्वचु बियादिगु ख: । सफू पिक्का:या पाखें मय्जु रामदेवी महर्जनं सफूया बारे छत्वा:चा खँ तसें थ:गु नुग: खँ प्वका दिल । सफू पिथने धुंका: अन दुपिं सकसितं छगू छगू सफू इनाबिउगु ख: । सभा नायो दुर्गा कुमारी महर्जनं सकसितं सुभाय बिया सभा क्वचायेका दिल ।

उगु सभाय् जनकवि राजभाइ जक:मिं थ:गु नुग: खँ तयेगु लिसें चिनाखँ नं न्यंका: दीगु ख: । अथे हे सानु श्रेष्ठ नं म्ये हालदीगु ख: । उगु ज्याभवलय् पाँगाया समाजसेवीपिं व हनेबह:पिं यक्वसिया हे सहभागिता दुगु ख: । ईन्जिनियर पद्म लाल महर्जन, ईन्जिनियर बालकृष्ण श्रेष्ठ, विजयकाजी डंगोल, कृष्ण हरि महर्जन, राजभाइ जक:मि, मेनूका महर्जन, केशव महर्जन, नरहरि महर्जन, नीलकण्ठ अमात्य, अष्ट महर्जन, ज्ञानवहादुर नेवा: लगायत यक्वसिनं ब्वति कयादीगु ख: ।



अन भा:पिं ज्येष्ठ नागरिकपिं गुलिं आजु छ:याथाय् मवयागु भिन्त्यादं धा:पिं, गुलिं नीदं दत धा:पिं नं दु । पाँगानिसें अनथ्यंक न्यासि वयेमफु, सवारी साधन नं मदुगुलिं वयेमखंगु थौं वयखन धका: लसता प्वकूपिं यक्व दु । मनय् लसतां भयबिलकि प्याखँ ल्हुइ मास्ति वइ धा:थें ज्याभव: क्वचायेका प्याखँ ल्हुया न्थ्याइपुकुपिं नं यक्व हे दु ।

नेपालभाषा केन्द्रिय विभागय् सहलह

यल / कछलागा ११, ११३७ नेपालभाषा केन्द्रीय विभागं नेपालभाषा विषय कया: विद्यावारिधि (पीएच.डी.) यानाचर्चापिं ब्विमित व इमि शोध निर्देशक(गाइड)लिसे थौं सहलह व्याकल ।

केन्द्रीय विभाग, यलधवाखाय् जूगु ज्याभवलय् विद्यावारिधि यानाचर्चापिं न्हय्मह ब्विम लिसें इमि शोध निर्देशकलिसे इलय् हे शोध प्रबन्ध चयन क्वचायेकेत छु गुकथं न्हयज्याय्माली धका: सहलह व्याकूगु ख: । नेपालभाषा केन्द्रीय विभागया प्रमुख डा. चन्द्रमान वज्राचार्य विद्यावारिधिया शोध प्रबन्ध चयन धइगु



छगू त:धंगु साधना ख: धासैं थुकिया लागिं अर्जुनदृष्टि मा:गु खँय् ब: बियादिल । विद्यावारिधि याय्त पारिवारिक समस्या हे दकलय् त:धंगु पंग:कथं न्हय:ने वयफुगुलिं उकिं विचलित मजुसे थ:पिन्त मानसिकरूपं तयार याय्त प्रमुख डा. वज्राचार्य सुभाब बियादिल ।

न्हय्मह ब्विमिया विद्यावारिधि पूवन धा:सा नेपालभाषा ख्य:या लागिं हे थ्व त:धंगु उपलब्धी जुइगु वयकलं धयादिल । गाइड मध्ये छम्ह डा. सुन्दर कृष्ण जोशी नं विद्यावारिधि याय्त ब्विमितय्के अर्जुनदृष्टि दयमा:गु खँय् ब: बियादिसें थ:गु विद्यावारिधिया विषययात कया: ब्विम न्हय: हे स्पष्ट जुइमा: धयादिल । नेपालभाषाय्

विद्यावारिधि याय्गु कुत: याना: नं पूर्वके मफुपिनिगु दसु बियादिसें डा. जोशी न्हापा विद्यावारिधि याय्धुकूपिं लिसें याय्गु कुत: या:पिनिगु अनुभव कया: थ:गु लँ तप्यका बनेगु सुभाब नं बियादिल । मेम्ह गाइड योगेश राज मिश्र न्हय्मह ब्विम लिसें इमि गाइड सहितया पूर्वकार्य समिक्षा गोष्ठी याय्गु सुभाब बियादिल । ज्याभवलय् ब्विम व गाइडदथुइ गुकथं न्हयज्याय्माली धका: सहलह नं जूगु ख: । नेपालभाषा केन्द्रीय विभाग मार्फत थ्वपालय् रास जोशी, वज्रमुनी वज्राचार्य, राजित वहादुर श्रेष्ठ, रवि शाक्य, जीवन महर्जन, सन साय्मि व त्रैलोक्यमान बनेपाली विद्यावारिधि यानाचवनादीगु दु ।

बखुमद: न्हय्गां जात्राया लसताय् विशेष अंक

कीर्तिपुर सन्देश साप्ताहिक

कार्यालय: निखासी टोल: कीर्तिपुर नपा-३

फोन नं.: ४३३३००७

kirtipur_sandesh@live.com

http://kirtipursandesh.blogspot.com

यँया दक्षिण पश्चिम लागाया

ऐतिहासिक नापं सांस्कृतिक कथं महत्वपूर्ण

किपू, पांगा, नगां, सतुंग:, ल्हवंखा, ब्वसिगां व

मच्छेगांया जात्रा बखुमद: जात्रा अर्थात न्हय्गांया

लसताय् वइगु मंसिर २२ गते बुधवा: कीर्तिपुर सन्देश

जात्रा विशेष कथं प्रकाशित पिथनेगु जूलिं उगु

जात्राया बारे थ:थ:गु लेख, रचना छ्वया हयादीत नापं

भितुना बियादीत इनाप यानाचवना ।

उगु विशेषाङ्कय् भितुना बियादीपिन्त कीर्तिपुर सन्देश

वा:पौ दच्छि तक सितिकं बिइगु जुइ ।



दैय दसं लालुपाते स्वां ह्वयेवं न्हय्गां जात्रा अर्थात बखुमद: जात्रा वल धका: मनूतयसं सीकी । जब चिकुलाया ई वइ अले लालेपाते स्वां ह्वइ न्हय्गां जात्रा वइन धका: मनूतयसं थुइकी । मेगु मौसमय् मम्हवइगु लालेपाते स्वां हे न्हय्गां जात्रा वःगुया संकेत खः । न्हापा न्हापा बखुमद: जात्रा जक धायेगु याना वयाच्वंगु थुगु जात्रा येंया दक्षिण पश्चिम लागायान् न्हय्गू नेवा: वस्तीया जात्रा जूगुलिं अःपुक न्हय्गां जात्रा धायेगु याना हःगु खः । छुं दशक न्हयःनिसें जक न्हय्गां जात्रा धायेगु यानाहःगु खः ।

किपू, नगां, पांगा, सतुंगा, ब्वसिगां, ल्हवखा, मच्छेगांया जात्रायात लिपांगु इलय् वया न्हय्गां जात्रा धायेगु याना हःगु दु । वस्तवय् बखु मदः अष्टमीयात केन्द्रीत याना बःखुयात मूल थाय् कथं नाला याइगु थुगु जात्राया विशेषता धइगु तःखा: नयेगु खः । अष्टमातुका नापं गच्छि छः अर्थात पीगंछःया जात्रा याइगु खः । थःथःगु थाय्या विशेष छःयात मूल छः कथं नाला जात्रा याइगु खः । थगु जात्राया विशेष स्वां धइगु हे लालुपाते स्वां खः । कछलागा अष्टमी बखुमदः



न्हय्गां जात्रा धइगु छु खः ?

श्रीकृष्ण महर्जन

अष्टीयात केन्द्रविन्दु कथं नाला याइगु बखुमदः जात्राया भूवलय् वःखुया विष्णुदेवी छःयात मूछः कथं नाला वयाच्वंगु खनेदु । थीथी नेवा: वस्तीइ जुइगु जात्राया दक्ले न्हापां नवःमि खुन्हु किपू नगर दुनेया नगामय् जात्रा याइगु चलन दु । कछलागा अष्टमी खुन्हु याइगु थुगु जात्रा धइगु चान्हय् जुइगु विशेष कथंया जात्रा खः । थुगु जात्रायात धाल्वा खाकेगु जात्रा नं धाइ । अथे हे नवःमि खुन्हु पांगय् विष्णुदेवी व बालकुमार ीया प्रमुख कथं नाला निखः छःखःया जत्रा याइगु चलन दु । नेवा: बाजं जाना याइगु थुगु जात्राया भूवल छःखः जात्रा पांगया देशय् दुने यंके न्हयः छःचपा: धइगु थासय् विशेष कथंया पुजाआजा याइगु चलन दु । अनं लिपा नेवा: वस्ती पांगय् यंका जात्रा याइगु खः । तसकं न्हयाइपुक जुइगु थुगु जात्रा धइगु निखः छःखः कुविया याइगु जात्रा खः । पांगया स्थानीय मनूतयसं सप्तमियात मूया: अले अष्टमीयात छवयेलाभू नापं नवःमियात मू जात्रा कथं नाला वयाच्वंगु दु । विष्णुदेवी व बालकुमार ी छःयात प्रमुख छः कथं नाला वयाच्वंगु थुगु जात्राया भूवलय् थःथितिपिं ब्वनेगु तर्क चलन दु । जात्राया भूवलय् दक्ले लिपा पांगया लछिइ थ्यंका क्वचायेकेगु याइ । अथे हे बःखुइ प्वः थकाली याना भव्य नयेमाःगु, सतुंगलय् छःया मूर्ति मतःसे प्वखः जात्रा यायेमाःगु नं चलन मदुगु मखु । अथे हे लिपांगु इलय् वया नैकाप लागयापिं नेवाःतयसं नं थःगु हे कथंया जात्रा यानाहःगु दु । उकिं न्हय्गां जात्रा धाःसां आ: वया च्यागू नेवा: वस्तीया जात्रा



जुया वःगु दु । नैकाप लागयापिं नेवाःतयसं ब्यागलं कथंया छःखः दयेका जात्रा यायेगु याना हःगु खः । थुगु कथं जात्राया भूवलय् विकास जुयावंगु खनेदु । न्हय्गां जात्राया भूवलय् कछलागा दशमी खुन्हु किपुलिं पश्चिमपाखेया वःखुइ सतुंगा:या छःखः, ब्वसिगांया छःखः, ल्हवखाया छःखः व तापाख्यःया छःखः हइगु चलन दु । अले वःखुइ जात्रा याना थःथःगु लागाय् यंका जात्रा याइगु खः । सांस्कृतिक बाजं थाना जात्रा याना यंकेगु याइसा किपुलिइ नं उखुन्हु हे जात्रा याइगु चलन दु । किपूया जात्राय् प्रमुख छः कथं इन्द्रायणीयात नालातःगु दुसा गणेशःया छःखः नं जात्रा याइगु खः । संभवतः स्वनिगःया कुविया याइगु जात्राया भूवलय् दक्ले तःखःगु छःखः हे किपुलिइ जुइमाः । अले न्वः तया दक्ले अप्वः मनूतयसं कुविइगु जात्रा जुइमाः । जात्राया भूवलय् किपूया लायकुलिइ द्वारे पुजा वनीगु चलन दु । द्वारे पुजा याइगु थाय् धइगु लायकू अर्थात तत्कालिन अवस्थाय् राजदरवार दुगु थासय् खः ।

आ: तर्क नं दरवारया ध्वाखाया रूपय् प्रतिक तयातःगु दुसा द्वारे जुया वनीमह ब्यक्ति व हे दरवारया ध्वाखाय् च्वनेमाःगु चलन दु । किपूया इन्द्रायणी जात्रापाखें नं किपुलिइ न्हापा लायकू अर्थात दरवार दुगु खः धका: स्पष्ट याना वयाच्वंगु दु । जात्राया भूवलय् छःखः कुविया जब किपूया बाघभैरव व लागु पुला: वनी अले नाय्खिनिसें काहां बाजं तर्क थाना पीगनय् लाखे पा:



खःसा लिपांगु इलय् वया धिमे बाजंयात वच्छि, वच्छि, याना छवयेगु यानाहःगु दु । वच्छि, धिमेबाजंयात बाघभैरव लागानिसें जात्राया भूवलय् छवयेगु अले मेगु बाजं धाःसा पीगनय् वना लाखेपा: च्वनाच्वंम्हेसित जात्रा याना हयेगु याइ । किपूया जात्राया भूवलय् दलू छःया जात्रा यायेगु, मन्दः मेय् स्याइगु, न्यकुं मेय् स्याइगु नं चलन दु ।

बखुमदः जात्राया भूवलय् प्वः थकाली याना भव्य नकीगु चलन नेवा: दुने समानता दु धका: क्यनाच्वंगु दुसा छगू हे इलय् जात्रा यानाच्वंगुलिं छगू कथं एकताया सन्देश नं वियाच्वंगु दु । जात्राय् नेवा: दुनेया प्वः अर्थात छःलानिसें ज्यापु, स्यस्यःनिसें नेवा: दुनेया फक्क कथंया थरया थःथःगु भूमिका दु । उकिं नेवाःतय् एकता यानातःगु जात्रा कथं नं लानाकाये फइगु अवस्था दु ।




संचार साक्षरता
एफ एम संचालन
उद्घोषणा
न्वचू कला

बखुमदः न्हय्गां जात्राया
लसताय् विशेष छ्यापं सहित

पत्रकार श्रीकृष्ण महर्जनं
च्यादीगु न्यागूगु सफू

स्वापू फोन ल्या: ४३३४०१३, ४३३३००७,
९८४१७५२५८३, ९८४१४०१०७७



नासः

हलिं नेवा: गुथि किपू कचां किपुली या:गु
“भिके-ल्वने-न्हूधा: यायेनु”छ्यौं तया चिनाखँ गोष्ठी व्वंगु चिनाखँ छसिंकथं
पिकया वनेगु तातुना थ्व चिनाखँ न्ह्यव्वयागु ख:

३. भिके-ल्वने-न्हूधा: यायेनु

—शंखनारायण नापित

वल आकाभाकाय् भुखाय्
न्यंकभनं स्यंका: वन
हान वल लिसा(लिसा कया: ख्यायेत भुखाय्
छें, द्य:ग: फल्वा यक्व स्यंकावन । १ ।
गुलि घा:पा: नल
गुलि अपाङ्ग जुल
असहाय बेदनाय् थ:थिति मदयेका च्वनेमाल
हाय् ! गुलि सहयाना च्वनेमाल । २ ।
यायेमाल आ: ला दँय छक:
२०७२ वैशाख १२ गतेया त:भुखाय्
“हाकुगु” दिन धका: मानय् याये
अलय् देछाय् दुखं क:पिं आत्माया श्रद्धाञ्जली । ३ ।
जनताया हिच:तिं पिहांव:गु संविधान
अभ्र ला कुंखिने वाकिं दनि थन
छें फल्वा द्य:ग: बहा: बहि दयेके ल्यं दनि
सांस्कृतिक सम्पदा निर्माण याके ल्यं दनि । ४ ।
आ: ला क्यनेमाल भीगु घा:
उला: क्यने भीगु भाषा समस्या
नापं वयाच्चनी मदिक तजिलजि
भिकेमा: संस्कार, संस्कृति व परम्परा भीगु । ५ ।
मजिल मजिल आ: ला
दुंगु दुंका: वरु स्वये धस्वाके भिका:

मायबिलिं त्यप घयपुइथें घयघयपुया:
जुइ गुबले थपू फुस्तु खँ ल्हाना । ६ ।
बुद्धया शान्ति खलवल याना:
घा:पा: अनेक दुख याना:
न नये न त्वने थाय्वाय् मदयेका:
अय् भुखाय् खुसिला मखुला छं दुख स्वया: । ७ ।
सूर्य: हुंकन लुइधुंकल
चाय्केमाल न्ह्यलं आ: ला
विश्व न्ह्यावने धुंकल
मखुसा धिकार याइ इतिहास । ८ ।
यायेमाल आ: ला हिम्मत
स्यंगु दुंगु भिका: न्ह्य:ने
भीगु जन्मभूमि भीगु देय्
च्वनी अलय् हलिमय् गौरव भीगु । ९ ।

७. सत्य

वासि नव:गु सत्य
सकस्यां थू स्यू
थुइ मानिगु सत्य
सुना नं मथू मस्यू ।
मिहग:या सत्य नं
थौया सत्य नापं पाइ
थ्व खँ स्यूसा नं मनूत
मथू मस्यू पह: याइ ।
गुलि नं दु, थ्व हलिमय्
थ:थ:पिसं क्यंगु दु
अदृष्य ज: मखंसां
उकिं लिच्च: क्यंगु दु ।

बिचा: हायेका

बुदिं : वि.सं.
१९८५ चैत्र



मदुगु दिं : २०७३
कार्तिक ३० गते



मदुम्ह : रामवहादुर महर्जन
नगां, की.न.पा. १६

जिमि स्या:न्याम्ह पासा कृष्णभक्त महर्जन (किसान)या
अबु **रामवहादुर महर्जन** वंगु कार्तिक ३० गते ८८ दँया वैसय्
आकाभाकां दिवंगत जूगु थौं १३ भिंस्वन्हूया पुण्यतिथिसं वय्कया
निर्वाण कामना यासैं सुखावती भुवनसं बास लायेमा । लिसैं दुखंक:पिं
सकल छँज:पिसं मन चिइफयेमा धका: बिचा: हायेका च्वना ।

पासापिं

ज्ञानवहादुर महर्जन
श्याम महर्जन
विश्वयम महर्जन
गुण प्रसाद जोशी

स्वयम्भुरत्न बज्राचार्य
रामलाल लामा
धर्म महर्जन लाय्कू
राजकुमार महर्जन
ओम श्रेष्ठ

अन्धविश्वासय् लिकुनाच्चंगु विज्ञान

मुलु नांगां तयातये मज्यू

पन्नारत्न महर्जन



नेवा: समाजय् थीथी
कथं संस्कृति दु अले
थ:थ:गु कथंया धारणा
दयेका वयाच्चंगु खने दु ।
संस्कृतिइ विविधता दुपिं
नेवा: समाज दुने थथे
याये मत्य: अथे याये मत्य
धका: थीथी कथंया
अन्धविश्वास ल्यनाच्चंगु
दु । अज्व:गु कथंया
अन्धविश्वास दुने
वास्तवय् विज्ञान
सुलाच्चंगु दु धका: पन्नार
त्न महर्जनं क्यनादीगु दु ।
वय्कलं नेवा: समाज नाप
स्वाका अन्धविश्वारय्
लिकुनाच्चंगु विज्ञान नांगु
सफू तकं च्वयादीगु ख: ।
व हे सफूपाखें निरन्तर
रुपं न्ह्यव्वया वयाच्चनागु
ख: - सं.

मुलु धयागु लं आदि सुइत
छयलीगु च्वामुगु नया छगू वस्तु
ख: । थ्व त:धं जुइमखु, बँय्
कुतुं वंसा काचाक्क खंके
थाकुइ । छुं नं तंगु वस्तु लुइके
थाकुलकि मुलुला मखु लुहे लुइनि

धाइगु चलनं याना: नं मुलुधयागु
चीधंगु वस्तु ख: धका: संकेत
या: ।

थपाय्सकं चीधंगु
वस्तुखय् वस: पुंका त:गुला
अवस्य खइमखु । अयनं नांगां
तयेमत्य व मज्यू धायेगु याइ ।
थ्व छगू अजू चायापुगु खँ ख: ।
वास्तवय् अजू चाये मा:गु छुं
मदु । मुलु नांगां तये मज्यू धयागु
मुलुइ सुका मतसैं तयातये मज्यू
धा:गु ख: ।

छुं नं चीज तनी बलय्
माले थाकुइगु स्वभाविक ख: ।

उकीसं चीधंगु वस्तु, मुलु तन
धायेव भन माले थाकुइ । तर
थुकी सुका घानातल धायेव मुलु
खंके मफुसां सुकां याना: खंके
अ:पुइ । मुलु नांगां तयातये मज्यू
धा:गु हुनिमध्ये थ्व नं छगू ख: ।

मुलु कुतुं वनाच्चंगु
मखना: उखें थुखें लानाच्चनी
बलय् थुकिं सुइय: । च्वका नं
च्वामुगु व तसकं चीपुगु जुइगुलिं
थुकिं सुइबलय् दुने थ्यंक नं वनेफु
। त:धिक: पित्त सूसाला मुलुं सुल
धका: धाये फइ । खँ ल्हाये मस:पिं
मस्तयूत सुल धा:सा थुकिं त:धंगु
नोक्सानी याइ ।

सुका घानात:गु दइबलय्
थज्यागु अवस्थाय् मुलु छुपुं दुहां
वंसां सुका पिने खनेदयाच्चनी
गुकिं याना: मुलु लिकायेत
ग्वाहालि जुइ । अथेला सुका खनेवं
हे अन मुलु नं दुला धका: न्हापा
हे सतर्क जुइ फइ ।

थथे मुलुं सुइगु पाखें बचय्
यायेत मुलुइ सुकाघाका तयेया
लागि मुलु नांगां तलकि लं मदइ
धका: ख्यायेगु व मुलु नांगागु
खनकि सुका तयाव्यूम्हसित न्हूगु
लं फिइ दइ धका: जनमानसय्
प्रचार यायेगु यानात:गु दु ।



सर्वमान्य नेता
गणेशमान सिंहया सच्छि व
छक्क:गु बुद्धिया लसताय्
नेपाली कांग्रेस किपू नगर
समितिया ग्वसालय्
शनिवा: किपुलिइ हिदान
ज्याभूव: जूगु दु ।
कांग्रेसया नेता प्रकाशमान
सिंहं उलेज्या यानादीगु उगु
ज्याभूव:या सभापति नगर
सभापति कृष्णमान डंगोल
जुयादीगु ख:सा अथे हे
विशेष पाहां सांसद राजन
केसी पाहां पार्टी यें
जिल्ला सचिव राजकुमार
नकर्मि जुयादीगु ख: ।

हगेबहग्ह

ब्वना पौ

ज्यापु महामुधि किपू नगरसमितिया ग्वसालय् नेपाल सम्वत १९३७ न्हूदँ व बबुंमद
न्हय्गां जात्राया लसताय् जुइगु भित्तुना कालबिल ज्याइव: व ज्यापु महामुधि किपू
नगरसमितिया जीवकाधि (आजीवन) ज:पित्त दसिपौ व मयजु दिपा महर्जनं च्वयादीगु
“पौगावा विष्णुदेवी बालकुमारी जात्रा” सफूया धिखीफयने ज्याइवलव पायधि इलय्
भावादीत इनाप यानाच्चना ।

तिथि : ने.सं.१९३७ धिलाथ्व चौथि (मंसिर १८ गते)


ई : सुधसिया ७:३० ता: इलय्

धाय् : कृष्ण क्याटरिङ्ग न्हबजा:, किपू-१७

नजरराम महर्जन
नाथो

बिचा: हायेका

जन्म: ने. सं.
१०५७ जेठ
शुल्क पूर्णिमा



मदुगु: ने. सं.
११३७ कछलाथ्व



मदुम्ह पूर्णवहादुर महर्जन

ज्यापु महागुथि किपू नगरसमितिया जिवंकाछि ज:पिं
प्रा.डा.नन्दबहादुर महर्जन, प्राचार्य नन्दकुमारी महर्जनया
कका व श्यामसुन्दर महर्जनया बाज्या पूर्ण वहादुर
महर्जन वंगु कार्तिक २९ गते ८०दँय् मदुगुलिं
मदुम्हिसिया चित्त शान्ति जुया सुखावती भुवनय् बास
लाय्मा धका: श्रद्धाञ्जली देछासैं थुगु दु:खया इलय्
छेंज:पिन्सं मनचिइ फयेमा धका: बिचा: हायेका च्वना ।

ज्यापु महागुथि

किपू नगर समिति

कुख्यातया दर्जाय् तै छिमित



कवि राम महर्जन
की.न.पा. १६, नगाउँ

सुथय भसंक न्हयोल: चावले
द्यो दनन:तुई धुंकल खनि
भुतया गर्भय् जन्म जुम्ह थें
हाकुगु इतिहास कोरे जुईधुंकल खनि ॥
दे या विदेशी ऋण लुमना वबले
जिगु मनया छ चा थुरु थुरु खाना वल
थम्ह से जक कुविया मगागु
छय छुई पिस तक कुविइ मागु ॥
छिमिसं भव्य महल दयका: छुयाय्
थगु हे दे या धुकु फोरे याना
छिमिके धेवा यक्को दयाँ छुयाय्
विदेशी वैकय् तय् यंके मा:गु ॥
जाल भेलया भाषा व भाषण सय्का
धेवा, मान, पद व इज्जत कमाय् याना छुयाय्
नेपाली जनताया मिखाय्

वयं च्वगु धु: बराबर ॥
छिमिगु मनय् दुने च्वंगु मन:
छिमित बारंबार न्यना च्वंगु दई
जिवनया हर हिसावया खाता
सत्य वा असत्य यमराज तया च्वंगु दइ ॥
अथेन छिमिसं थगु स्वार्थया लागि
जनताया जिवन बर्बाद याना
जनताया मिखा ख्ववि जा: साँ
थपि सफल नेता ताय्का च्वंगु दु ॥
देश व जनतायात बर्बाद याना
सफल नेता धाय्का च्वपिन्त:
देशभक्त लेखकया कलम:
कुख्यातया दर्जाय् तइ छिमित ॥

**छिगू नं चिनाखँ, बाखनिसें
छुं नं कथंया च्वसू दुसा
बियादिसं जिमिसं
त्व:कंहवा:गु ज्वजलपा
वा:पतिइ पिकायेगु जुइ ।**

ज्याकू: निखासी त्वा: किपू नपा-३
फोन ल्या: ४३३३००७,
९८४१४०१०७७
ई-मेल :
kirtipur_sandesh@live.com

निर्वाण कामना



जन्म: ने. सं.
१०५७ जेठ
शुल्क पूर्णिमा



मदुगु: ने. सं.
११३७
कछलाथ्व



मदुम्ह पूर्णवहादुर महर्जन

थुगु FED FUND संस्थाया सदस्यपिं शान्तराम महर्जन (पांगा)या कका, श्याम सुन्दर महर्जनया बाज्या पूर्ण वहादुर महर्जन
वंगु कार्तिक २९ गते ८०दँय् मदुगुलिं मदुम्हिसिया चित्त शान्ति जुया सुखावती भुवनय् बास लाय्मा
धका: श्रद्धाञ्जली देछासैं थुगु दु:खया इलय् छेंज:पिन्सं मनचिइ फयेमा धका: बिचा: हायेका च्वना ।

बिचा: हायेकूपिं

- १.भाजु/मय्जु नरेन्द्र महर्जन
- २.भाजु/मय्जु रामभोला महर्जन
- ३.भाजु/मय्जु राजन दुवाल श्रेष्ठ
- ४.भाजु/मय्जु रमेश महर्जन
- ५.भाजु/मय्जु राजकुमार नकर्मि
- ६.भाजु/मय्जु शान्तराम महर्जन (नगां)

- ७.भाजु/मय्जु बुद्धरत्न महर्जन
- ८.भाजु/मय्जु गजेन्द्र अमात्य
- ९.भाजु/मय्जु कृष्णभक्त महर्जन (किसान)
- १०.भाजु/मय्जु हरिशरण महर्जन
- ११.भाजु/मय्जु महेश डंगोल
- १२.भाजु/मय्जु नन्दकाजी महर्जन
- १३.भाजु/मय्जु रबिन्द्र महर्जन

- १४.भाजु/मय्जु राजेन्द्र महर्जन
- १५.भाजु/मय्जु राजेन्द्र मानन्धर
- १६.भाजु/मय्जु रुकमल श्रेष्ठ
- १७.भाजु/मय्जु शेखर सिंह डंगोल
- १८.भाजु/मय्जु श्याम कुमार महर्जन
- १९.भाजु/मय्जु अष्टवहादुर महर्जन
- २०.भाजु/मय्जु त्रिरत्न मानन्धर
- २१.भाजु/मय्जु सुरेन्द्र श्रेष्ठ